

四庫全書

經部

欽定四庫全書

經部

周禮纂訓卷二

詳校官監察御史_臣施朝幹

刑部郎中_臣許兆椿覆勘

總校官編修_臣王燕緒

校對官待詔_臣胡士震

謄錄監生_臣左振麟

欽定四庫全書

經部四

周禮纂訓

禮類一 周禮之屬

提要

臣等謹按周禮纂訓二十一卷

國朝李鍾倫撰鍾倫字世得安溪人康熙癸酉
舉人未仕而卒此書自天官至秋官詳纂注
疏加以訓義惟闕考工記不釋蓋以河間獻
王所補非周公之古經也書後有乾隆丁丑

其子廣平府知府清馥跋稱鍾倫初受三禮於其叔光坡康熙癸酉鄉薦公車後日侍其父光地於京邸及光地出督順天學政復遷直隸巡撫十餘年中鍾倫皆隨行得其指授又多與宣城梅文鼎長洲何焯宿遷徐用錫河間王之銳同里陳萬策等互相討論故其學具有本源凡所詮釋頗得周官大義惟於名物度數不甚加意故往往考之弗詳如巾

車重翟錫面朱總厭翟勒面續總安車彫面
鷺總皆有容蓋註總以繒為之著馬勒直兩
耳與兩鑣車衡轡亦宜有馬容為檐車山東
謂之裳帷蓋如今小車蓋也皆有容有蓋則
重翟厭翟謂蔽也安車無蔽謂去飾也鍾倫
謂總惟當施馬於車義無所取考蔡邕獨斷
曰飛軫以油緹廣八寸長注地左畫蒼龍右
畫白虎繫軸頭續漢書輿服志曰乘輿重牙

班輪升龍飛軫注引薛綜東京賦注飛軾以
油緹廣八寸長注地繫軸頭所云油緹即注
所云總以緹為之所云軸頭即注所云軾然
則飛軾即總之在車者而鍾倫謂總惟飾馬
誤矣鍾倫又謂容以緹結四旁之上際其四
旁之下際則以翟為蔽攷經文皆有容蓋寔
兼承上重翟厭翟安車而言但重翟厭翟二
車既有容蓋又有翟蔽兩旁以畫飾安車則

惟有容蓋而無翟飾耳既無翟飾即惟藉裳
惟為障蔽惟裳之制當四面圍合上下通徹
故詩曰漸車帷裳箋云帷裳童容也方言檐
褕江淮南楚謂之種裕童容與種裕義同蓋
種裕長襦上下相連以覆體車之帷裳垂覆
上下形相似也又士昏禮婦車亦如之有褱
注褱車裳帷續漢書輿服志注舊典傳車騂
駕赤帷裳惟郭賀為冀州勅去檐帷釋名社

襜也在旁檐檐然云檐帷蓋如裳衽下垂也
凡此皆同于巾車之安車但有帷裳無重翟
厭翟者也如鍾倫所云帷裳但結四旁之上
際其四旁下際以翟為蔽則安車但蔽上際
不復蔽下際矣釋名曰容車婦人所載小車
也其蓋施帷以隱蔽其形容也若容但蔽上
際不及下際豈能隱蔽形容乎如此之類頗
為踈舛然如辨禘祫社稷學校諸篇皆攷證

詳核又如司馬法謂革車一乘甲士三人步卒七十二人鍾倫據蔡氏說謂一乘不止甲士三人步卒七十二人此是輕車用馬馳者更有二十五人將重車在後今攷新書攻車七十五人前拒一隊左右角二隊守車一隊炊子十人守裝五人廐養五人樵汲五人共二十五人攻守二乘共百人又尉繚子伍制令軍中之制五人為伍伍相保也十人為什

什相保也五十人為屬屬相保也百人為閭
閭相保也起于五人訖于百人蓋軍中之制
自一乘起此皆一乘百人之明驗足證其說
之精核又明于推步之術訓大司徒土圭之
法謂六十餘里餘景已差一寸亦得諸臆測
非同講學家之空言也乾隆四十六年十月
恭校上

總纂官

臣

紀昀

臣

陸錫熊

臣

孫士毅

總校官 臣陸費墀

欽定四庫全書

周禮纂訓卷一

安溪李鍾倫撰

天官冢宰第一

惟王建國辨方正位體國經野設官分職以為民極乃立天官冢宰使帥其屬而掌邦治以佐王均邦國

注辨別也是別四方名誥太保乃以庶殷攻位於維汭越五日甲寅位成正位謂此定宮廟體猶分也經

謂為之里數鄭司農云營國方九里國中九經九緯
左祖右社面朝後市野則九夫為井四井為邑之屬
是也

治官之屬大宰卿一人小宰中大夫二人宰夫下大夫
四人上士八人中士十有六人旅下士三十有二人府
六人史十有二人胥十有二人徒百有二十人

宮正上士二人中士四人下士八人府二人史四人胥
四人徒四十人

宮伯中士二人下士四人府一人史二人胥二人徒二十人

膳夫上士二人中士四人下士八人府二人史四人胥十有二人徒百有二十人

庖人中士四人下士八人府二人史四人賈八人胥四人徒四十人

庖扶交切
賈音古

內饔中士四人下士八人府二人史四人胥十人徒百

人饔於
容反

外饗中士四人下士八人府二人史四人胥十人徒百
人

亨人下士四人府一人史二人胥五人徒五十人

亨晉
庚反

甸師下士二人府一人史二人胥三十人徒三百人

甸
田

通反

獸人中士四人下士八人府二人史四人胥四人徒四
十人

獻人中士二人下士四人府二人史四人胥三十人徒

三百人

魚 獻音

鼈人下士四人府二人史二人徒十有六人

鼈必列反

腊人下士四人府二人史二人徒二十人

腊音昔

醫師上士二人下士四人府二人史二人徒二十人

食醫中士二人

疾醫中士八人

瘍醫下士八人

瘍音羊

獸醫下士四人

酒正中士四人下士八人府二人史八人胥八人徒八十人

酒人奄十人女酒三十人奚三百人

漿人奄五人女漿十有五人奚百有五十人

漿子良反

凌人下士二人府二人史二人胥八人徒八十人

凌力證反

籩人奄一人女籩十人奚二十人

醢人奄一人女醢二十人奚四十人

醢呼在反

醢人奄二人女醢二十人奚四十人

醢本又作醢呼西反

鹽人奄二人女鹽二十人奚四十人

冢人奄一人女冢十人奚二十人

冢莫
歷反

宮人中士四人下士八人府二人史四人胥八人徒八十人

掌舍下士四人府二人史四人徒四十人

幕人下士一人府二人史二人徒四十人

幕武
博反

掌次下士四人府四人史二人徒八十人

大府下大夫二人上士四人下士八人府四人史八人

賈十有六人胥八人徒八十人

玉府上士二人中士四人府二人史二人工八人賈八人胥四人徒四十有八人

內府中士二人府一人史二人徒十人

外府中士二人府一人史二人徒十人

司會中大夫二人下大夫四人上士八人中士十有六

人府四人史八人胥五人徒五十人

會古
外反

司書上士二人中士四人府二人史四人徒八人

職內上士二人中士四人府四人史四人徒二十人
職歲上士四人中士八人府四人史八人徒二十人
職幣上士二人中士四人府二人史四人賈四人胥二
人徒二十人

司裘中士二人下士四人府二人史四人徒四十人
掌皮下士四人府二人史四人徒四十人

內宰下大夫二人上士四人中士八人府四人史八人
胥八人徒八十人

內小臣奄上士四人史二人徒八人

閹人王宮每門四人圍游亦如之

寺人王之正內五人

內豎倍寺人之數

九嬪

世婦

女御

女祝四人奚八人

女史八人奚十有六人

典婦功中士二人下士四人府二人史四人工四人賈
四人徒二十人

典絲下士二人府二人史二人賈四人徒十有二人

典枲下士二人府二人史二人徒二十人

每絲
里反

內司服奄一人女御二人奚八人

縫人奄二人女御八人女工八十人奚三十人

染人下士二人府二人史二人徒二十人

追師下士二人府一人史二人工二人徒四人

追丁曰反一曰

雌

屨人下士二人府一人史一人工八人徒四人

屨紀具反

夏采下士四人史一人徒四人

大宰之職掌建邦之六典以佐王治邦國一曰治典以經邦國以治官府以紀萬民二曰教典以安邦國以教官府以擾萬民三曰禮典以和邦國以統百官以諧萬民四曰政典以平邦國以正百官以均萬民五曰刑典

以詰邦國以刑百官以糾萬民六曰事典以富邦國以

任百官以生萬民

治典之治直吏反下同擾而小反鄭而昭反諧戶皆反詰起一反

注典常也經也法也王謂之禮經常所秉以治天下也邦國官府謂之禮法常所守以為法式也常者其上下通名擾猶馴也統猶合也詰猶禁也任猶俾也生猶養也

疏自此至職末分為二段從此至以富得民十條明經國之大綱治政之條目自正月之吉至職末

明頒宣前法依事而施訓冢宰即唐虞時百揆職也六卿各有分職冢宰則兼掌之掌之者總其綱而攷其成凡施布之令廢置之權皆得與天子參之也經邦國謂恩威出納之權賦貢均節之度猶治絲之有經也治官府如官屬官職之類官事所以得其條理也紀萬民如八統九職九兩之屬纖悉詳密如網之有紀也安邦國如畫封疆建社稷富而教之所以奠安之也教官府如鄉大夫受教

法於司徒及令羣吏攷法于司徒以退是也擾萬
民謂飲射讀法賓興賢能所以馴習之也和邦國
者禮有吉凶軍賓所以和同之也統百官謂車旗
衣服之等諧萬民謂飲食婚冠之文平邦國如九
法九伐去其不平以平之也正百官如司士所掌
朝儀之位貴賤之等所以正之也均萬民如合方
氏所掌通其財利同其數器壹其度量所以均齊
之也詰邦國如建邦之三典刑百官如糾職之官

刑糾萬民如凡獄訟之事皆是唐虞建官首百揆次司空后稷司農司徒敷教兵刑之任統於士師秩宗典樂著為二職歷夏及商稍有更易食貨祭祀職在冢宰而司馬司寇分主兵刑馬是故洪範夏書殷人守之八政之次食貨祀為先次司空次司徒次司寇賓屬宗伯師屬司馬蓋因民生日用之緩急為先後非六官之序如此也周公更定六典司徒之職養教相成宗伯一官專主祀事典樂

附焉行人司儀乃屬司寇朱子以為朝覲時諸侯
有肉袒請罪之禮故其官隸於司寇理或然也司
空所以居五官之末者家君子之論審矣蓋三代
以後水土事平度地居民經畫頗易若夫百工備
用之職於禮樂兵刑諸官輕重異次故曰殷周之
損益可知也

以八瀟治官府一曰官屬以舉邦治二曰官職以辨邦
治三曰官聯以會官治四曰官常以聽官治五曰官成

以經邦治六曰官灋以正邦治七曰官刑以糾邦治八

曰官計以弊邦治

灋古法字
弊心世反

注百官所居曰府鄭司農云官屬謂六官其屬各六十小宰職曰以官府之六屬舉邦治官職謂六官之職小宰職曰以官府之六職辨邦治聯謂聯事通職相佐助也小宰職曰以官府之六聯合邦治官常謂各自領其官之常職非聯事通職所共也官成謂官府之成事品式也小宰職曰以官府之八成經邦治

官法謂職所主之法度小宰職曰以灋掌祭祀朝覲會同賓客之戒具官刑謂司刑所掌墨劓宮刖殺罪也官計謂三年則大計羣吏之治而誅賞之立謂官刑司寇之職五刑其四曰官刑上能糾職官計小宰之六計所以斷羣吏之治

疏官刑先鄭謂司刑所掌此是正五刑施于天下非為官中之刑故後鄭不從之也官計謂三年大計此為三年一攷乃一計之此官計每歲計之故

後鄭亦不從之訓小宰職具八灋據注尚少官常
官刑家君子謂官刑即小宰職末令于百官府所
謂國有大刑官常即小宰職首官府之六敎蓋尊
卑以敘乃官府之常灋也治官府以大體為先有
官屬所以優大官而集衆事也故首之治官府以
明察為要有官職所以使六屬條其類而百執事
得其理也故次之屬固所以舉邦治矣有一屬所
不能舉者則必會他屬而舉之故繼以官聯職固

所以辨邦治矣然六職之中有尊卑錯綜又必以其序而聽之故繼以官常此四者正治官府之法也官成治民事也官法治朝儀之事也民事為切故先官成次官法此二者皆官府治事之法也官刑官計皆所以督課其成功故終焉刑以糾其不稱職者計以斷其或稱或否官刑逐時行之官計則待歲終而斷之故計又後於刑也

以八則治都鄙一曰祭祀以馭其神二曰灋則以馭其

官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八

曰田役以馭其衆

馭魚
慮反

注都之所居曰鄙則亦灋也都鄙公卿大夫之采邑
王子弟所食邑周召毛畢之屬皆畿內者祭祀其先
君社稷五祀灋則其官之制度廢猶退也退其不能
者舉賢而置之祿若今月奉也位爵次也禮俗昏姻
喪紀舊所行也鄭司農云士謂學士

疏云都鄙公卿大夫之采邑者載師職云家邑任
稍地則大夫之采也小都任縣地則六卿之采也
大都任疆地則三公之采也云王子弟所食邑者
親王子母弟與公同處而百里次疏者與六卿同
處而五十里次疏者與大夫同處二十五里王子
母弟雖食采地未必別有官有官則依公卿大夫
食邑不假別言也云灋則其官之制度者謂官室
車旗衣服之等皆不得僭也據田役以馭其衆則

卿大夫得田獵而豐卷請田子產不許者常田之外臨祭取鮮惟人君耳大夫唯得常田故子產云唯君用鮮明大夫不合也訓馭者上操其權以制其下也馭其神者釐正祀典無僭舉也凡治民者皆曰吏祿位以馭其士謂未出仕者賢則進而祿位之如鄉有賓興之禮是也祭祀灋則廢置祿位皆施於在上者賦貢禮俗刑賞田役皆施於百姓者先治神而後治人故祭祀為先法則次之此二

者辨等威之事吏已出仕者士未仕者故次廢置
次祿位此二者定功罪之事賦貢下之所以供上
禮俗上之所以化下先理財而後施教也刑賞所
以威民田役所以用民其平日畏威而遠罪故一
旦有事而可用也八則所條已備君民規模者都
鄙有立國之義也

以八柄詔王馭羣臣一曰爵以馭其貴二曰祿以馭其
富三曰予以馭其幸四曰置以馭其行五曰生以馭其

福六曰奪以馭其貧七曰廢以馭其罪八曰誅以馭其

過

柄兵
命反

疏餘條皆不言詔獨此與下八統言詔王者餘竝
羣臣職務此乃王所操持故特言詔也案內史亦
言此八柄之事變誅言殺欲見為惡不止則殺之
此經八事自五曰以上皆是善事則大善者在前
小善者在後自六曰以下皆是惡事則大惡者在
前小惡者在後訓郎氏云予者爵祿之外別有所

賜也出於特恩故曰幸生以馭福者有罪可殺以
八議而生之得生為福也而八柄所列實不過爵
祿生殺四者故首言爵次言祿予者非常之祿也
置者不次之爵也生者可殺而猶生之也奪者去
其祿也廢者去其爵也誅以施小過殺以致大罪
舉一而可此內史所以變誅言殺互文見義也

以八統詔王馭萬民一曰親親二曰敬故三曰進賢四
曰使能五曰保庸六曰尊貴七曰達吏八曰禮賓

注統所以合率以等物也禮賓賓客諸侯所以示民親仁善鄰

疏鄭云統所以合率以等物也謂率下民與上合皆有以等其事上行之下效之也故以萬民為主也訓八統所謂上行之下效之者如上進賢斯下興於賢上使能斯下進於能上保庸斯民勉於功此其義也達吏禮賓家君子謂吏亦庸也賓亦貴也天下之治親親賢賢貴貴而已三者之中親親

為重故先之進賢使能賢賢也尊貴貴貴也敬故
是親親之推也保庸達吏是賢賢之推也禮賓是
貴貴之推也達此三治者於天下之民此謂上行
之下效之也此謂詔王馭萬民也

以九職任萬民一曰三農生五穀二曰園圃毓草木三
曰虞衡作山澤之材四曰藪牧養蕃鳥獸五曰百工飭
化八材六曰商賈阜通貨賄七曰嬪婦化治絲枲八曰
臣妾聚斂疏材九曰閒民無常職轉移執事

圖布古反
毓古育字

藪連荀反牧音目蕃扶元
反飭音勅賈音古聞音閑

注鄭司農云三農平地山澤也九穀黍稷秬秠麻大
小豆大小麥八材珠曰切象曰磋玉曰琢石曰磨木
曰刻金曰鏤革曰剥羽曰析聞民謂無事業者轉移
為人執事若今傭賃也玄謂三農原隰及平地九穀
無秣大麥而有粱苽樹果蓏曰圃園其樊也虞衡掌
山澤之官主山澤之民者澤無水曰藪牧牧田在遠
郊皆畜牧之地行曰商處曰賈阜盛也金玉曰貨布

帛曰賄嬪婦人之美稱也臣妾男女貧賤之稱疏材
百草根實可食者疏不熟曰饅

疏鄭司農云三農平地山澤以其積石曰山水鍾
曰澤不生九穀故後鄭不從之也爾雅高平曰原
下濕曰隰原及平地可種黍稷之等隰中可種稻
麥及菰園圃毓草木者即載師所云塲圃任園地
謂在田畔樹菜蔬果蓏者鄭既云虞衡掌山澤之
官後云山澤之民者山澤之民無名號故借虞衡

之官以表其民云牧田在遠郊者見載師云牧田
任遠郊之地云皆畜牧之地者按載師職注牧田
畜牧者之家所受田也牧六畜之地無文鄭約與
家人所受田處即有牧畜之地也云行曰商處曰
賈者諸官之下有賈人無行法故曰處易曰商旅
不行是行曰商也云疏材百草根實者百草或取
根如菱芡之屬或取實若榛栗之屬訓農者民之
本業故為先園圃虞衡藪牧地利之所生也百工

商賈嬪婦人功之所成也次及臣妾微者也最後
間民無常職者也或曰司徒頒十二職此僅舉其
九何也意主於頒賦法也出賦者唯有此九等民
也

以九賦斂財賄一曰邦中之賦二曰四郊之賦三曰邦
甸之賦四曰家削之賦五曰邦縣之賦六曰邦都之賦

七曰關市之賦八曰山澤之賦九曰幣餘之賦

剏本亦作稍又

作郛所教反
徐所召反

注財泉穀也鄭司農云邦中之賦二十而稅一各有
差也玄謂賦口率出泉也邦中在城郭者四郊去郭
百里邦甸二百里家削三百里邦縣四百里邦都五
百里此平民也關市山澤謂占會百物幣餘謂占賣
國中之斥幣皆未作當增賦者

疏云關市山澤謂占會百物者謂關上以貨出入
有稅物市若泉府廛布總布之等亦有稅物山澤
人民入山澤取財物亦有稅物此人占會百物為

官出息幣餘謂占賣國中斤幣斤幣謂此物不入
太府指斥出而賣之故名斥幣云當增賦者謂口
率出泉增於上農民訓邦中之賦已下六者農民
之賦也關市山澤幣餘三者末作之賦也

以九式均節財用一曰祭祀之式二曰賓客之式三曰
喪荒之式四曰羞服之式五曰工事之式六曰幣帛之
式七曰芻秣之式八曰匪頒之式九曰好用之式

注式謂用財之節度工作器物者幣帛所以贈勞賓

客者芻秣養牛馬禾穀也鄭司農云匪分也頒謂班
賜也玄謂王所分賜羣臣也好用燕好所賜予

疏式謂依常多少用財法式也云工作器物者若
考工所作器物也訓九式即大府凡頒財以式法
授之關市之賦以待王之膳服以下是也以某賦
待某事皆量其財之多少足以供其事之巨細此
謂式也賓客之式者謂諸侯國來朝聘王待之之
式也幣帛之式者王遣使出聘侯國有所賚予謂

或有吉凶事之類也芻秣若司徒之牧人牛人充人司馬之馬質校人是也匪頒祿廩也即百官之祿祭祀賓客喪荒皆大事故為先羞服所以供王身之需故次之工事幣帛芻秣所以供國家之需故又次之匪頒好用所以賜羣臣之需故又次之以九貢致邦國之用一曰祀貢二曰嬪貢三曰器貢四曰幣貢五曰材貢六曰貨貢七曰服貢八曰游貢九曰物貢

注嬪故書作賓鄭司農云祀貢犧牲包茅之屬賓貢
皮帛之屬器貢宗廟之器幣貢繡帛材貢木材也貨
貢珠貝自然之物也服貢祭服游貢羽毛物貢九州
之外各以其所貴為摯玄謂嬪貢絲枲器貢銀鐵石
磬丹漆也幣貢玉馬皮帛也材貢櫨榦栝柏篠簜也
貨貢金玉龜貝也服貢絺紵也游讀如囿游之游燕
好珠璣琅玕也物貢雜物魚鹽橘柚

疏此貢諸侯邦國歲之常貢則小行人云令春入

貢是也大行人云侯服歲一見其貢祀物彼謂因
朝而貢與此別也云九州之外各以其所貴為摯
後鄭不從者九州之外世一見無常貢之法也云
幣貢玉馬皮帛者覲禮諸侯享禮云匹馬卓上九
馬隨之訓每歲常貢蓋於比年小聘之時使大夫
致之嬪貢未織之物必經婦功而後成者服貢織
成之物中衣服之用者器貢成器可用者幣貢疑
是充筐篚而未必中服用者貨貢可當財布之用

者旂貢輕微可當玩好之用者祀貢為先嬪貢器
貢幣貢材貢皆用物也故次之貨貢異物也故又
次之服貢王私用之物也故又次之旂貢物貢非
切用且微物也故又次之家君子曰貢出於邦國
賦出於九職之民而天府所掌九貢九賦之外又
有九功曰凡萬民之貢以充府庫者何也蓋九貢
畿外諸侯之貢九功畿內九職之民所貢也據禹
貢冀州無厥貢之文則畿內無貢故鄭氏以為九

功者九職之財也然先王之世取諸民者貢賦稅
三者而已貢其地所有之物則為貢計其夫家出
兵車牛馬器械則曰賦田野山澤關市之稅則曰
稅此外不應復有名條如後世之苛政今鄭氏以
九功為九職之財則是謂九職之稅矣其釋九賦
則謂口率出泉所謂口賦也夫有田則有稅有身
則有役計口出財古疑未有焉況九職之稅所得
至多而掌在大府者特以充府庫而已口賦所出

疑其無幾而九式皆取共於此則是國家之經費
盡倚給於口賦一事其所取於民者為不貲矣外
此尚有田野山澤闕市之征兵車牛馬器械之具
民生其間不亦難乎由此觀之則謂賦為口率者
誣也蓋賦對稅而言之則稅為財物賦為兵車專
以賦言則賦稅統之矣禹貢亦言田賦而不言稅
是賦其總名也九賦斂財賄即九職之稅也九功
之貢則九職之貢也蓋王畿之內采邑既多亦有

諸侯之義以九職之所出為貢情理之常無可疑者事異夏殷禮從而變未可一槩況也

以九兩繫邦國之民一曰牧以地得民二曰長以貴得民三曰師以賢得民四曰儒以道得民五曰宗以族得民六曰主以利得民七曰吏以治得民八曰友以任得民九曰數以富得民

繫音計數于云宜作吏

注兩猶耦也所以協耦萬民繫聯綴也牧州長也九州各有封域以居民也長諸侯也一邦之貴民所仰

也師諸侯師氏有德行以教民者儒諸侯保氏有六藝以教民者宗繼別為大宗收族者鄭司農云主謂公卿大夫世世食采不絕民稅薄利之玄謂利讀如上思利民之利謂以政教利之吏小吏在鄉邑者友謂同井相合耦耤作者數亦有虞掌其政令為之屬禁使其地之民守其財物以時入于王府頒其餘於萬民

疏九曰數以富得民舉數而言則山澤十等皆有

材物民居可知也訓牧言地長言貴互文也師儒
皆鄉學之師大司徒以本屬六安萬民四曰聯師
儒注曰師儒鄉里教以道藝者疏曰致仕賢者使
教于鄉里謂之師儒據此則師儒非師氏保氏然
彼師儒連言此離而二之或大夫致仕者為師或
士致仕者為儒亦一說也故大傳曰大夫為父師
士為少師師曰賢儒曰道亦互文也至渙者天下
之民先王所以協比聯屬而不使之離異者教養

而已牧長君也師儒師也宗法親也此教之屬也
主與吏道民以利者也友與藪使民各得以安其
利也此養之屬也牧主聯合有土其所繫者不止
一國之民故曰以地得民以貴得民者天子畿外
其貴得伸故內公卿大夫出封皆加一等以示貴
也都鄙之主不言貴侯國之長言貴以此矣以利
得民者都鄙之主民則里居地則井授是以死徙
不出鄉地著而重本樂其樂利其利也

正月之吉始和布治于邦國都鄙乃縣治象之法于象

魏使萬民觀治象挾日而斂之

縣音玄挾
子協反

注正月周之正月吉謂朔日大宰以正月朔日布王
治之事于天下至正歲又書而縣于象魏振木鐸以
徇之使萬民觀焉小宰亦帥其屬而往皆所以重治
法新王事也鄭司農云象魏闕也從甲至甲謂之挾
日凡十日

疏始和始調和六典八法以下之事和訖當月即

頒布邦國都鄙是畿外畿內徧天下言乃縣者乃
緩辭至建寅之月乃縣治象之法于雉門象魏挾
日斂藏之於明堂於後月月受而行之謂之告朔
也

乃施典于邦國而建其牧立其監設其參傅其伍陳其

殷置其輔

參七南反傅音
附徐方慕反

注乃者更申勅之侯伯有功德者加命作州長謂之
牧所謂八命作牧監謂公侯伯子男各監一國書曰

王啟監參謂卿三人伍謂大夫五人殷衆也謂衆士也輔府史庶人在官者

疏鄭云以侯伯有功德者加命作州長謂之牧者是先取侯有功德者為牧若無賢侯伯亦得云加命作州長者以其侯伯七命州牧八命云參謂卿三人者左傳杜泄云吾子為司徒夫子為司馬孟氏為司空則諸侯三卿司徒司馬司空也伍謂大夫五人者謂司徒下二大夫一大夫為司徒大夫

一大夫為太宰大夫司空下二大夫一大夫主司空事一大夫為司空大夫司馬事省闕一大夫故五人陳其殷者三卿下各陳士九人也

乃施則于都鄙而建其長立其兩設其伍陳其殷置其輔

注長謂公卿大夫王子弟食采邑者兩謂兩卿不言三卿者不足於諸侯

疏大宗伯云六命賜官注云王六命之卿使得自

置其臣治家邑大夫四命不合立官云長謂公卿
大夫者以大夫雖不立官亦得稱長是廣解長義
此中唯有都鄙無家邑之名故都鄙中含公卿大
夫春官都宗人家宗人都家並有公卿雖有大都
小都之別而同名都大夫不得都名故公卿入都
宗人中大夫入家宗人中夏官都司馬家司馬又
與此異六卿卑自使其臣為司馬王家不為之立
司馬故都司馬唯三公與王子弟其卿又入家司

馬中若然都鄙之內其號有三若得諸侯之號唯三公王子弟若置官如諸侯即卿與公同若稱長可及大夫

乃施灋于官府而建其正立其威設其攷陳其殷置其輔

注正謂冢宰司徒宗伯司馬司寇司空也貳謂小宰小司徒小宗伯小司馬小司寇小司空也攷成也佐成事者謂宰夫鄉師肆師軍司馬士師也司空已未

聞其攷

疏按上官府在都鄙上此文在都鄙下者欲見都鄙置臣與諸侯同又見諸侯下亦有都鄙之義鄉師注云匠師事官之屬其於司空若鄉師之於司徒若然則匠師亦司空之攷訓注疏釋始和謂始調和典法則已下之事又謂建子之月始和而布之建寅之月乃縣而觀之愚意布之與縣非有異時且據凌人十二月斬冰是夏十二月冰堅而斬

之若周十二月乃建亥之月非可斬冰十二月既
是夏十二月則正月自是夏正月安得以正月繫
之於周十二月繫之於夏豈有正月建子十二月
建丑者乎始和者陽氣開動和煦之始布治即縣
治象施典法則是也治象之法凡太宰所掌者也
此治象之法非專施於萬民其縣而使萬民觀之
挾日而後斂之者欲令傳播相聞自近及縣牧長
殷輔之屬皆所以奉行典法則而布之者故施典

施則施法即是將收長殷輔之屬更申飭之建立
陳設等義勿泥可也上文由官府都鄙而及邦國
此文由邦國都鄙而及官府或先近而後遠所以
尊內或先遠而後近重有國也

凡治以典待邦國之治以則待都鄙之治以灋待官府
之治以官成待萬民之治以禮待賓客之治

注成八成禮賓禮也

疏以其天官主治故以目之此皆言以者當別有

篇卷執持施行之訓凡治謂施典施則施法之類
六典八法八則八成賓禮各有條目見於周禮者
或僅舉其大綱如祿位以馭其士必有都鄙取士
之法賦貢以馭其用必有都鄙財賦之法田役以
馭其衆必備都鄙出師之法他事皆然在當時必
載之成書太宰藏之若頒施于邦國都鄙之等則
依此書所載攷而行之故曰以典待邦國之治云
云上文無賓客事惟八統有禮賓之條其文不詳

此言以禮待賓客之治者祭祀賓客喪紀皆大事
故行人之官雖隸於司寇而冢宰猶必關與之也
祀五帝則掌百官之誓戒與其具修

注祀五帝謂四郊及明堂誓戒要之以刑重失禮也
明堂位所謂各揚其職百官廢職服大刑是其辭之
略也具所當共脩掃除糞洒

疏五帝者東方青帝靈威仰南方赤帝赤熛怒中
央黃帝含樞紐西方白帝白招拒北方黑帝叶光

紀依月令四時迎氣各於其郊及季夏六月迎土
氣於南郊并夏正祭所感帝於南郊是四郊也云
及明堂者總饗五帝於明堂依月令秦用季秋末
知周以何月訓五帝名號不經辨見大宗伯首章
前期十日帥執事而卜曰遂戒

注前期前所諏之日也十日容散齋七日致齋三日
執事宗伯太卜之屬既卜又戒百官以始齋

疏凡祭祀謂祭前之日為期今言前期十日明祭

前十一日云執事宗伯太卜之屬者謂宗伯涖卜

太卜視齊命龜中含有小宗伯卜師故言之屬

及執事眡滌濯

眡音視本又作視後皆同滌直虛反濯直角反

注執事初為祭事前祭日之夕滌濯謂灑祭器及甑

甗之屬

疏案大宗伯小宗伯二官親眡滌濯太宰尊亦往

涖之

及納亨贊王牲事

亨音庚反

注納亨納牲將告殺謂鄉祭之晨既殺以授亨人凡大祭祀君親牽牲大夫贊之

疏此祭天無祿故先迎牲若宗廟之祭有祿而後迎牲也

及祀之日贊玉幣爵之事

注玉幣所以禮神玉與幣各如其方之色爵所以獻齊酒不用玉爵尚質也三者執以從王至而授之

祀大神亦亦如之

示本又作祗音幾

注大神示謂天地

疏謂冬至祭天於圜丘夏至祭地於方澤亦如之者從掌百官誓戒以下皆如祀五帝禮

享先王亦如之贊玉几玉爵

注玉几所以依神天子左右玉几宗廟獻用玉爵

疏亦如之下別言贊玉几玉爵則天地不用玉几

玉爵注云天子左右玉几者欲見鬼神之几與生

同

大朝覲會同贊玉幣玉獻玉几玉爵

注助王受此四者大會同或於春朝或於秋覲舉春秋則冬夏可知玉幣諸侯享幣其合亦如小行人所合六幣云玉獻獻國珍異亦執玉以致之玉几王所依也立而設几優尊者玉爵王禮諸侯之酢爵王朝諸侯立依前南面其禮之於阼階上

疏時見曰會無常期諸侯有不順服者其順服者皆來會以師助王討之殷見曰同謂十二歲王如

不巡狩諸侯衆來同見天子云大會同或於春朝
或於秋覲者大會雖無常期當春來即是春朝當
秋來即是秋覲冬夏亦然若大同則有常期春東
方六服盡來夏南方六服盡來秋冬亦然在國行
朝禮訖乃皆為壇於國外而命事焉云玉幣諸侯
享幣者諸侯會同皆依四時常朝春夏受贄於朝
受享幣者於廟秋冬一受之於廟受朝訖乃受享
獻國所有珍異云其合亦如小行人所合六幣云

者小行人所云謂四時常朝不見大朝覲會同法
鄭約當與常朝同也云玉獻獻國珍異亦執玉以
致之者謂三享之外獻國珍異亦如三享執玉以
致之云立而設几優尊者几為坐設今立而設几
故云優尊也云玉爵王禮諸侯之酢爵者案大行
人上公再裸而酢之等此裸時大宗伯攝裸非冢
宰所贊但諸侯酢王用玉爵則冢宰贊王受之云
禮之於阼階上者謂裸諸侯時也知在阼階上者

案燕禮主君在阼階當依賓主之禮也訓玉幣玉
獻者其幣其獻皆以玉先之也玉幣是行享之時
用之即小行人中圭以馬以下皆束帛加璧以致
之享有三初享是圭以馬等再享三享則有魚腊
籩豆龜金虎豹之皮丹漆絲纁竹箭其餘無常貨
各以其國之所有陳之皆以束帛加璧先也此即
大行人歲一見其貢祀物之屬因朝而有非每歲
常貢三享之外別有獻國珍異亦執玉以致之故

云玉獻也王禮諸侯之酢爵者謂王裸侯而侯助
王玉爵非裸爵乃酢爵裸爵是大宗伯攝裸冢宰
不得贊宗伯也

大喪贊贈玉含玉

舍本又作舍
戶暗反後同

注助王為之也贈玉既窆所以送先王含玉死者口

實天子以玉雜記曰含者執璧則諸侯含以璧

疏贈玉於葬用之含玉始死用之

作大事則戒于百官贊王命

注助王為教令春秋傳曰國之大事在祀與戎

疏上已陳祭祀大事訖則此惟戎事也

王眡治朝則贊聽治

注治朝在路門外羣臣治事之朝王眡之則助王平

斷

疏王有三朝外朝是斷疑獄之朝路寢庭朝圖宗
人嘉事二者事簡非正朝故知治朝是路門外司
士所掌者也

眠四方之聽朝亦如之

注謂王巡狩在外時

疏征伐外亦有聽朝法以非常法故不言也

凡邦之小治則冢宰聽之待四方之賓客之小治

注大事決于王小事冢宰傳平

歲終則令百官府各正其治受其會

注正正處也會大計也

疏謂正處其所治文書太宰乃受其計會也

聽其致事而詔王廢置

注平其事來至者之功狀而奏白王

疏有功者置之進其爵有罪者廢之退其爵

三歲則大計羣吏之治而誅賞之

注大無功不徒廢必罪之大有功不徒置必賞之訓
百官府非止治官之屬或曰教司徒職也八統親
親敬故之類與九兩師儒之文若疑於教焉何也曰
司徒之數教也親奉教法而頒行之曰討斯民而諄

諭之故以教命官也冢宰所掌皆所以治在上者之事不曰輔導天子則曰綜核百官事皆攬其大綱而未嘗有所專主故不可以一職名焉此其所以異也

典法則其規模也八柄八統其綱領也九職以下其條理也

典治邦國法治官府則治都鄙

八柄威福之事八統教化

之事皆君道也九職制民之產賦式取民之制皆民事也九貢所以使邦國尊天子九兩所以教邦國養萬民冢宰之官以其規模言之則總理五官遙制

四海也以其總領言之則調變王身肅清宮闈也以其職事言之則司食貨制入出盡之矣

周禮纂訓卷一

欽定四庫全書

周禮纂訓卷二

安溪李鍾倫撰

小宰之職掌建邦之宮刑以治王宮之政令凡宮之糾禁

注宮刑在王宮中者之刑

掌邦之六典八灋八則之貳以逆邦國都鄙官府之治
執邦之九貢九賦九式之貳以均財節邦用

注逆迎受之鄭司農云貳副也

疏逆謂迎受勾考之使知功過所在也訓邦國都鄙官府之治有能否小宰攷察之以告冢宰冢宰以詔王廢置均財者均其所入謂貢賦有恒經節用者節其所出謂式灋有定制小宰稽其籍以詔冢宰量入為出制國用

以官府之六敘正羣吏一曰以敘正其位二曰以敘進其治三曰以敘作其事四曰以敘制其食五曰以敘受

其會六曰以敘聽其情

注敘秩次也謂先尊後卑也治功狀也食祿之多少情爭訟之辭

訓此六敘家君子謂即八灋中官常是也以其官之尊卑秩次有常是之謂官常進如呼昭穆而進之之進進其治者進而授之以所治之職謂施法于官府之時六者皆先尊後卑所謂序也次位列者於朝頒治職者亦當於朝類也事以服勤食以

報功類也會定功罪情弊曲直亦類也

以官府之六屬舉邦治一曰天官其屬六十掌邦治大事則從其長小事則專達二曰地官其屬六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十掌邦事大事則從其長小事則專達

注大事從其長若庖人內外饗與膳夫共王之食小事專達若宮人掌舍各為一官達于云達決也

訓從謂共其使令聽其教戒官各有長總言之治官以太宰為長又分之食官以膳夫為長推此類可見

以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三曰禮職以和邦國以諧萬民以事鬼神四曰政職以服

邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物注懷亦安也賓客來共其委積所以安之聚百物者司馬主九畿職方制其貢各以其所有

訓司空主興事任力使土不曠民不遊則百物以生典王者所操職當官所掌故典言官府而職不言官府以其皆官府之事也平邦國謂執典法則以權衡中外均萬民謂均其賦貢其餘言邦國萬

民雖文異而義同政典言均萬民而政職言正萬
民均猶齊也正猶整也整齊一也節財用懷賓客
以下典不言而職言之者典舉其義故其文括職
主其辨故其事詳

以官府之六聯合邦治一曰祭祀之聯事二曰賓客之
聯事三曰喪荒之聯事四曰軍旅之聯事五曰田役之
聯事六曰斂施之聯事凡小事皆有聯

施尸民反劉本作施音弛杜作

注鄭司農云大祭祀太宰贊玉幣司徒奉牛牲宗伯
眡滌濯滌玉鬯省牲鑊奉玉盞司馬羞魚牲奉馬牲
司寇奉明水火大喪太宰贊贈玉含玉司徒帥六鄉
之衆庶屬其六紉宗伯為上相司馬平士大夫司寇
前王此所謂官聯杜子春弛讀為施玄謂荒政弛力
役及國中貴者賢者服公事者老者疾者皆舍不以
力役之事奉牲者其司空奉豕與

疏大祭祀唯太宰尊不奉牲宗伯不言奉雞司馬

直言奉馬不兼言奉羊司寇不言奉犬皆略不言可知

以官府之八成經邦治一曰聽政役以比居二曰聽師田以簡稽三曰聽閭里以版圖四曰聽稱責以傳別五曰聽祿位以禮命六曰聽取予以書契七曰聽賣買以質劑八曰聽出入以要會

政鄭音征司農如字比毗志反註同稱昌證切傳音附別

彼列反會古外反凡要會會計之字皆放此

注鄭司農云政謂軍政役謂發兵起徒役比居謂伍

籍簡閱也稽計也計其士之卒伍閱其兵器為之要簿也版戶籍圖地圖聽人訟地以版圖決之稱責謂貸子傳別謂券書傳傳著約束於文書別別為兩兩家各得一也禮命謂九賜也書契符書也質劑謂市中平賈若今時月平要會謂計最之簿書玄謂政謂賦也其字或作正或作征傳別謂為大手書於一札中字別之書契謂出予入受之凡要凡簿書之最目獄訟之要辭皆曰契質劑謂兩書一札同而別之長

曰質短曰劑禮命禮之九命之差等

疏稱責謂舉責生子即泉府職以國服為之息聽
祿位以禮命者有人爭祿之多少位之前後則以
禮命文書聽之取予謂於官直貸不出子者出入
是官內自用物有人爭此官物者則以要會簿書
聽之傳別謂於券背上大作一手書中央破之為
二段別之質劑前後作一券中央破之兩家各得
其一皆無手書字異於傳別訓聽謂聽其治或有

獄訟則亦聽之聽祿位以禮命謂興賢能之時萬民中有德行道藝者進而禮命之若欲授祿制爵則以禮命之書攷之家茂夫叔父謂取予者歲時之施惠在官為予在民為取必以書契者防冒濫也出入者泉府之斂賒泉府所出廩人所入皆有要會相參攷也泉府之貸於民有二有賒而不取息者有貸而取息者此泉府所出謂無息者與稱責異也

以聽官府之六計弊羣吏之治一曰廉善二曰廉能三
曰廉敬四曰廉正五曰廉灋六曰廉辨

注聽平治也平治官府之計有六事弊斷也既斷以
六事又以廉為本善善其事有辭譽也能政令行也
敬不解于位也正行無傾邪也灋守法不失也辨辨
然不疑惑也

疏六者不同既以廉為本又計其功過多少而聽
斷之故云六計弊羣吏之治也訓仁心為質之謂

善材力可任之謂能畏威勤事之謂敬剛直不撓
之謂正遵守成式之謂灋審察精詳之謂辨敬與
正皆善之類也灋與辨亦能之屬也

以灋掌祭祀朝覲會同賓客之戒具軍旅田役喪荒亦
如之七事者令百官府共其財用治其施舍聽其治訟

共音
恭

注灋謂其禮法也戒具戒官有事者所當共施舍不
給役者

疏七者皆是上六聯百官聯事通職者以其衆官共故云令百官府共其財用也訓共其財用治其施舍即六聯中斂弛之事此一節注疏以為八灋中官灋之事

凡祭祀贊王幣爵之事裸將之事

祿古
亂反

注又從太宰助王也將送也裸送送裸謂贊王酌鬱鬯以獻尸凡鬱鬯受祭之啐之奠之

疏上太宰不言贊裸將則太宰不贊之故注直云

小宰贊王酌鬱鬯也

凡賓客贊裸凡受爵之事凡受幣之事

注唯裸助宗伯其餘皆助太宰王不酌賓客而有受酢

疏云其餘者謂受爵幣二者賓客酢王之時太宰於賓處受而授王王飲訖太宰受爵以授小宰受幣之時王親受受以授太宰太宰以授小宰也

喪荒受其含襚幣玉之事

襚音遂

注凶荒有幣玉者賓客所賙委之禮

疏喪謂王喪諸侯諸臣得致含襚幣玉上太宰不言是小宰專受之賙委謂諸侯賙委王家灋也

月終則以官府之敘受羣吏之要

注主每月之小計

疏月計曰要使官府致其簿書之要受之當先尊後卑也云小計對歲會為大計也若大計則冢宰平之

替冢宰受歲會歲終則羣吏致事

注使齋歲盡文書來至若今上計

正歲帥治官之屬而觀治象之瀆徇以木鐸曰不用瀆

者國有常刑

徇音旬
从徇非

注正歲謂夏之正月得四時之正以出教令者審也

古者將有新令必奮木鐸以警衆以明聽也木鐸木

舌也文事奮木鐸武事奮金鐸

疏木鐸以木為舌金鐸以金為舌訓此治屬之官

刑也

乃退以宮刑憲禁于王宮

注憲謂表縣之

疏凡刑禁皆出秋官小宰得秋官刑禁文書表而
縣之於宮內也訓此宮中之宮刑也以其王宮故
但表縣之

令于百官府曰各修乃職攷乃灋待乃事以聽王命其
有不共則國有大刑

訓當官所守謂之職國家所定謂之法此統六屬之官刑也此一節家君子以為八瀆中官刑之事小宰職貳冢宰以贊王攷核之事稽察之政而其職獨詳於治官府是故首言王宮之治其中掌宮正內宰所以弼王也次言典法則式賦貢之貳其中掌司會大府所以佐冢宰也故為先六敘以下次列八瀆皆治官府之事官屬畢備則人足以任官也官職各辨則人各有專責也職事相聯則

一屬一職之人所不能治者合之他屬他職以治之也此三者皆治人也官成者有已成之律令官計者有一定之功罪官灋者有相循之禮儀比三者皆治灋也一月之計小宰受之一歲之會冢宰決之而小宰贊焉示之以灋威之以刑此所以佐冢宰亮天工而熙庶職也或曰小宰陳列八灋其序異於冢宰何也曰冢宰之治官府義主於邦治者也小宰之治官府義止於官府者也主於邦治

則以設官分職為大主於官府則以序次尊卑為
體故其序不同也官灋之後於官計何也曰計所
以攷定功罪官成以上皆所當計也法也者先時
以令于百姓當其事則訓其灋百官廢法則有常
刑不待稽察功過之日而始斷之故離而後之也
終之以官刑何也曰經文凡有數可紀者皆在於
前官刑無數可紀且其辭曰修乃職攷乃法待乃
事是不過取上文諸法而申儆之亦如冢宰先次

六典以至九兩正月以下則所以頒施前法者此
周官立言之例也

宰夫之職掌治朝之灋以正王及三公九卿大夫羣吏
之位掌其禁令

注治朝在路門之外其位司士掌馬宰夫察其不如
儀

訓此所謂以敘正其位

敘羣吏之治以待賓客之令諸臣之復萬民之逆

注恒次敘諸吏之職事三者之來則應使辨理之復之言報也反也反報於王謂於朝廷奏事自下而上曰逆逆謂上書

疏宰夫次敘羣吏諸臣等之治職即以待賓客以下三事賓客之令謂若太宗伯朝覲會同則為上相肆師大朝覲佐儐之屬諸臣之復謂若夏官小臣職云掌三公及孤卿之復逆太僕職云掌諸侯之復逆此諸臣中兼之萬民之逆謂御僕職掌羣

吏庶民之復逆彼羣吏為府史以下與此羣吏別
宰夫恒次敘諸官使辦理其事訓諸臣言復萬民
言逆互文也賓客之令以下三者非宰夫親掌之
次敘當職之官使掌之也此亦以敘作其事之類
為其為治朝之法故遂言之

掌百官府之徵令辨其八職一曰正掌官灋以治要二
曰師掌官成以治凡三曰司掌官灋以治目四曰旅掌
官常以治數五曰府掌官契以治藏六曰史掌官書以

贊治七曰胥掌官敘以治敘八曰徒掌官令以徵令

藏才

浪反注
治藏同

注別異諸官之八職以備王之徵召所為正辟於治
官則冢宰也治要若歲計也師辟小宰宰夫也治凡
若月計也司辟上士中士治目若今日計也旅辟下
士也治數每事多少異也治藏藏文書及器物贊治
若今起文書草也治敘次序官中如今侍曹伍伯傳
吏朝也徵令趨走給召呼

疏治敘次序官中者謂官中須人驅役之處則次序其徒也云伍伯傳吏朝者漢時五人為伍伯長也傳吏朝者傳在朝羣吏諸官事務於朝胥為什長亦然舉漢法況之也訓此所謂以敘進其治正者卿長官灋如治官有治象之灋教官有教象之灋是也六官之灋皆六官之長主之官咸謂官府之治績成效掌之者受而句考之也治目之官灋如膳夫酒正之屬彼亦自為一官之長所掌者膳

羞及酒漿之法度而不必親掌其物故曰灋也推
類可見旅曰官常者衆士官卑人執其職職分有
常是曰官常要者事之綱領凡者事之撮括目者
事之科條數者不一其事列而可數也八職之事
尊者職要卑者職詳宰夫辨之以待王使令也

辟音譬本亦作譬傳直專反

掌治灋以致百官府羣都縣鄙之治垂其財用之出入
凡失財用物辟名者以官刑詔冢宰而誅之其足用長

財善物者賞之

辟徐芳石反劉芳益反于云不當也

注羣都諸采邑也六遂五百家為鄙五鄙為縣言縣鄙而六鄉州黨亦存焉乘猶計也財泉穀也用貨賄也物畜獸也辟名詐為書以空作見文書與實不相應也

疏宰夫是甸攷之官故以治灋攷百官府及羣都縣鄙鄉遂之內治功善惡也訓此一節佐小宰貳典法則式賦貢之事小宰掌逆邦國都鄙官府之

治宰夫卑故不及邦國治法亦謂典法則也財用
入出亦謂式賦貢也垂其財用之其亦指官府縣
都也

以式灋掌祭祀之戒具與其薦羞從大宰而眡滌濯凡
禮事贊小宰比官府之具

注薦脯醢也羞庶羞內羞

疏按儀禮諸單言薦者皆是脯醢故知薦脯醢也
庶羞謂天子八豆諸侯六豆之等內羞謂祭祀食

後所加少牢所謂房中之羞糗餌粉飧是也訓式
灋亦謂小宰官灋也

凡朝覲會同賓客以牢禮之灋掌其牢禮委積膳獻飲
食賓賜之殮牽與其陳數

委於僞反積子賜反後二字
相連皆同此音飲於鵠反食

音嗣殮

音孫

注牢禮之法多少之差及其時也三牲牛羊豕具為
一牢委積為牢米薪芻給賓客道用也膳獻禽羞俶
獻也飲食燕饗也鄭司農云殮夕食也牽牲牢可牽

而行者玄謂殯客始至所致禮凡此禮陳數存可見者唯有行人掌客及聘禮公食大夫

疏掌其牢禮下別言委積之等則此牢禮謂饗餼之禮委積是賓未至時在道所設饗餼是朝日致之今在委積上者惟饗餼是禮之大者且委積非特賓來時共之賓去亦共之在下亦宜云膳獻禽羞俶獻者禽羞謂成熟有齊和者俶獻四時珍美新物也云飲食燕饗不解食為食禮者經中言食

則食禮自明今云飲食燕饗止有飲入燕禮饗中
又兼飲與食以其饗有米有酒也司農以殮為夕
食解之按聘禮客始至大夫帥至于館宰夫朝服
設殮但客至即設不要待夕故後鄭不從之也訓
掌牢禮委積之等者供其物也掌其陳數者辨其
多少隆殺凡皆牢禮之設所具委積在道所供殮
牽始至所供饗餼膳獻飲食至後所供殮牽次在
後者家茂夫叔父曰賓之殮牽所以待賓賜之殮

金匱要略卷二
率以待羣介行人宰史然則殮率中包待諸侯臣
禮故在後也

凡邦之弔事掌其戒令與其幣器財用凡所共者

注弔事弔諸侯諸臣幣所用賻也器所致明器也凡
喪始死弔而含祔葬而賵贈其間加恩厚則有賻焉

疏弔謂王使人弔諸侯自弔諸臣從王行者並有
贈喪之具百官當共即是凡所共者

大喪小喪掌小官之戒令帥執事而治之

注大喪王后世子小喪夫人以下小官士也其大官則冢宰掌其戒令治謂共辨

訓鄭氏所以釋大喪為后世子小喪為夫人以下者蓋對下文三公六卿之喪及諸大夫之喪是外喪則此大喪小喪是內喪矣然大喪中亦兼王喪言執事者宮中之喪掌事者亦有內豎女御及內外宗之屬男女不等且容有無爵者故不可言官有司也

三公六卿之喪與職喪帥官有司而治之凡諸大夫之喪使其旅帥有司而治之

注旅冢宰下士

訓此一節贊小宰治官灋之事七事中闕師役凶荒者宰夫所職稽察朝儀居多師役凶荒是外禮故也

歲終則令羣吏正歲會月終則令正月要旬終則令正日成而以致其治治不以時舉者以告而誅之

注歲終自周季冬正猶定也治不時舉者謂違時令
失期會

疏治不時舉謂文書稽滯者訓上豕宰掌歲會小
宰掌月要則日成當宰夫自掌之此羣吏亦非止
治官之屬

正歲則以灋警戒羣吏令修宮中之職事書其能者與
其良者而以告于上

注良猶善也上謂小宰太宰也

疏上云令修官中之職事則此謂官中諸吏也正
歲之正月則豫選之擬至歲終當舉之也訓宰夫
者佐小宰句攷之官所職亦與小宰相侔但其治
差狹小宰主治官府故凡官府之灋無不關小宰
者宰夫則於其中稽察朝儀校核功過而已故首
言治朝之灋次辨八職之治皆所以肅班行次尊
卑而使之居其所以任其事即小宰所謂官常者
此皆稽察禮儀之事也掌治法以攷羣吏之治乘

財用之出入而詔冢宰誅賞此皆糾核功過之事也
也以式灋掌祭祀之戒具凡朝覲會同賓客之牢
禮與夫弔事喪紀之戒令即小宰所謂官灋者此
又稽察禮儀之事也羣吏之治日入其成月進其
要歲獻其會宰夫令之以贊冢宰小宰而攷治焉
宮中之吏則有敎戒之條賢能之書以訓迪職事
而待上之舉焉此又糾核功過之事也故曰宰夫
者贊小宰句攷之官也

宮正掌王宮之戒令糾禁以時比宮中之官府次舍之衆寡為之版以待夕擊柝而比之國有故則令宿其比

亦如之

比徐芳履反一音毗志反柝吐各反

注比校次其人之在否官府之在宮中者若膳夫王府內宰內史之屬次諸吏直宿舍其所居寺版其人之名籍待待戒令及比鄭司農故謂禍災立謂故凡非常也文王世子曰公有出疆之政庶子以公族之無事者守於公宮正室守太廟諸父守貴宮貴室諸

子諸孫守下宮下室此謂諸侯也王之庶子職掌國
子之倅國有大事則帥國子而致於太子唯所用之
者令宿之事蓋亦存焉

疏云令宿之事蓋亦存焉者宿衛之事亦在惟所
用中彼是甲兵不云宿衛故云亦存焉訓以時比
之謂每夕則比國有故則比也衆寡士庶子之屬
辨外內而時禁

注鄭司農云分別外人內人禁其非時出入自內宰

所掌以內為內以外為外

稽其功緒糾其德行幾其出入均其稍食

行下孟反

注幾其出入若今時無引籍不得入宮司馬殿門也

疏言引籍者有門籍及引人皆得出入也訓按功
緒以其見于職事言也德行以其修於身言也

此內兼治官府以下則治庶子及人徒

去其淫怠與其奇衰之民

衷似嗟反亦作邪

注民宮中吏之家人也

疏使之不為即是去也訓民中容有胥徒之屬在

宮中者

會其什伍而教之道藝

注五人為伍二伍為什會之者使之輩作輩學相勸
帥且寄宿衛之令

疏會謂會合宮中子弟宮正掌宮中卿大夫士亦
兼掌子弟

月終則會其稍食歲終則會其行事

訓行事至歲終乃會者防有黜陟總計一歲功過多寡可以黜陟行事謂功緒德行道藝之屬

凡邦之大事令于王宮之官府次舍無去守而聽政令注使居其處待所為

訓大事與上有故異故是有倣此大事則又廣矣如祭祀賓客會同喪紀之類其詳在諸子職言待所為其事不一非止於令宿也

春秋以木鐸修火禁

注火星以春出以秋入因天時而以戒

疏春為季春秋為季秋此火謂陶冶鑄銅之火此
火禁謂宮正施於宮中者

凡邦之事蹕宮中廟中則執燭

蹕音畢

注事祭事也邦之祭社稷七祀於宮中祭先公先王
於廟中隸僕掌蹕止行者宮正則執燭以為明

疏云祭社稷七祀於宮中者宗廟社稷在宮中中
門之外王出向二處當寢晨而行則宮正執燭為

明也

大喪則授廬舍辨其親疏貴賤之居

注廬倚廬也舍堊室也親者貴者居倚廬疏者賤者居堊室雜記曰大夫居廬士居堊室

疏大喪謂王喪臣子斬衰則同廬舍所居則異親者謂大功以上貴者謂大夫以上疏者謂小功緦麻賤謂士訓宮正一官首言比法次辨外內此所以治王宮之守也次而掌其稽功糾行之條與其

幾察出入之務次而嚴其淫怠竒衰之禁與其什伍道藝之教此所以治宮中之人也月終會其稍食歲終會其行事此所以結治宮中之人也有大事則令無去守此所以足守王宮之事也衛宮中者有官府及士庶子其比法與其戒令皆宮正統之宮正宮伯所掌無卿大夫之適子只是庶子適子使之入學司樂教之庶子使之宿衛諸子教之所謂士庶子者士謂官府庶子謂卿大夫之庶子

也說見師氏保氏

宮伯掌王宮之士庶子凡在版者

注王宮之士謂王宮中諸吏之適子也庶子其支庶也

疏宮伯掌宮中卿大夫之適子庶子士之適子也
按大司馬王弼勞士庶子彼注士為卿大夫士庶
子為卿大夫之子則兼適庶與此不同者彼更無
弼勞卿大夫士身故士為卿大夫庶子中兼適庶

是鄭望文以為義也

掌其政令行其秩敘作其徒役之事

注秩祿稟敘才等也作徒役之事太子所用

訓行案行也秩祿之厚薄敘位之先後

授八次八舍之職事若邦有大事作宮衆則令之月終則均秩歲終則均敘

注衛王宮者必居四角四中於徽候便也次其宿衛所在舍其休沐之處

疏言四角四中者以其言八似若八方為四方四
維故以四角四中解之訓家茂夫叔父曰授職事
即掌其政令也令宮中即作其徒役也月終均秩
歲終均敘即行其秩敘也 職事謂伺察守望也

均亦會也

微古
弔反

以時頒其衣裘掌其誅賞

訓宮伯之職以貳宮正士庶子之治宮正亦兼掌
之復專設宮伯一官者士庶子有起徒役之事徒

役事繁不得兼職也 蔡氏曰宮正宮伯掌王宮者也 在王宮者百官府有版士庶子亦有版百官府有次舍士庶子亦有次舍此皆郎衛也太僕司隸虎賁所掌皆兵衛也天子之衛有二其別有四卿大夫士之在宮中者宮正掌之士庶子之在宮中者宮伯掌之視朝則司士正其儀大事則諸子掌其政此守環列之衛也王視朝則前正位而退王出入則自左馭而前驅視朝則在路門之左太

僕掌之小臣御僕屬焉此僕從侍御之衛也虎士
八百人先後王而趨以卒伍視朝則在路門之右
虎賁氏掌之旅賁氏屬焉此奔走先後之衛也居
虎門之左使其屬帥四夷之隸各以其兵服守王
之門外且蹕師氏掌之帥四翟之隸使服其邦之
服執其邦之兵以守王宮司隸掌之此周防捷閉
之衛也士庶子之在版者皆卿大夫士之子弟有
諸子以攷之成材者有司樂以合之宮伯惟均秩

敝頌衣裘掌誅賞而已

膳夫掌王之食飲膳羞以養王及后世子

食音嗣

注食飯也飲酒漿也膳牲肉也羞有滋味者凡養之具大略有四

疏云養王及后世子者舉尊者言其實羣臣及三夫人以下亦養之食飲膳羞即下文食用六穀飲用六清等六清水漿醴醕醫酏不言酒文略也下文仍有珍用八物醫用百有二十璫不言者此舉

大者珍醬是饋之小者

凡王之饋食用六穀膳用六牲飲用六清羞用百有二

十品珍用八物醬用百有二十鹽

鹽音寔
屋貢反

注進物於尊者曰饋此饋之盛者王舉之饌也六牲
馬牛羊豕犬雞也羞出於牲及禽獸以備滋味謂之
庶羞公食大夫禮內則下大夫十六上大夫二十其
物數備焉天子諸侯有其數而物未得盡聞珍謂淳
熬淳母炮豚炮牂擣珍漬熬肝腎也醬謂醢醢也鄭

司農云六穀稌黍稷粱麥苽苽彫胡也六清水漿醴
醑醫醢

疏云羞出於牲及禽獸者按公食大夫下大夫十
六豆從腳臙臙以下皆出於牲不見有出禽獸上
大夫加以雉兔鶉鴛此則出禽獸也云天子諸侯
有其數者此經云天子百有二十掌客云公四十
侯伯三十二子男二十四云物未得盡聞者謂少
有聞其數皆從上大夫二十豆以上加之內則云

牛修及爵鷄蜩范芝栢已下三十一物注云皆人
君燕食所加庶羞也云珍謂淳熬已下是為八珍
內則有糝與飭彼是羞豆之實非珍云醬謂醢醢
者醬是總名經云百有二十醢醢人共醢六十醢
醢人共醢六十醢故知醬中兼有醢醢也

王曰一舉鼎十有二物皆有俎

注殺牲盛饌曰舉王曰一舉以朝食也后與王同庖
鼎十有二牢鼎九陪鼎三物謂牢鼎之實亦九俎

疏言王日一舉者謂一日一太牢云物皆有俎者
俎據正鼎鼎各一俎鄭云王日一舉以朝食者按
玉藻云皮弁以日視朝遂以食日中而餼餼者餼
朝之餘明知先朝食次乃日中而餼云后與王同
庖者玉藻云夫人與君同庖注云不特殺明后與
王亦然云鼎十有二牢鼎九陪鼎三者按聘禮致
饗餼注云飪一牢鼎十有二是也牢鼎九者牛羊
豕魚腊腸胃同鼎膚鮮魚鮮腊陪鼎三者當內魚

腳腫曉陪牛羊豕鼎後也云亦九俎者陪鼎三腳
腫曉者為庶羞在於豆惟牢鼎之物在俎趙商問
玉藻天子日食少牢朔月太牢與此不同鄭云禮
記後人所集或以諸侯同天子或以天子與諸侯
等難據為說當以經為正也

以樂侑食膳夫授祭品嘗食王乃食

注侑猶勸也祭謂刲肺脊也禮飲食必祭示有所先
品者每物皆嘗之道尊者也

疏殷祭肝周祭肺祭肺有二種一名舉肺亦名離肺此為食而有也二名祭肺亦名剗肺此為祭而有也舉肺離而不絕祭肺則絕之此為食而授云剗肺脊者以優至尊故與祭祀同也曲禮云殷之序徧祭之今徒言祭肺者略舉其首者也

卒食以樂徹于造

注造作也鄭司農云造謂食之故與居處也已食徹置故處

疏造食處即厨是也內則云天子之閣左達五右達五亦是置食處此不徹於閣者閣內是置新饌故徹于造祭祀徹時歌雍此歌未聞

王齊日三舉

疏齊必變食故加牲體至三太牢按玉藻朔食加於日食一等則此朔食當兩太牢不言者文不具齊時不樂故不言以樂侑食也

大喪則不舉大荒則不舉大札則不舉天地有裁則不

舉邦有大故則不舉

札則八反徐音截裁音災

注大荒凶年大札疫癘天裁日月晦食地裁崩動也大故寇戎之事鄭司農云大故刑殺也春秋傳曰司寇行戮君為之不舉

疏司寇行戮君為之不舉謂不舉樂此在膳夫食料之中不舉即是不殺牲引司農義在下者欲見大故中含刑殺不舉中含不舉樂也

王燕食則奉膳贊祭

注燕食謂日中與夕食奉膳奉朝之餘膳所祭者牢肉

疏按玉藻天子云日中而餽諸侯云夕深衣祭牢肉鄭注云天子言日中諸侯言夕天子言餽諸侯言祭牢肉互相挾則天子諸侯朝皆祭肺日中與夕皆祭牢肉

凡王祭祀賓客食則徹王之胾俎

注膳夫親徹胾俎胾俎最尊也其餘則其屬徹之賓

客食而王有胙俎王與賓客禮食主人飲食之俎皆為胙俎見於此矣

疏云胙俎最尊者胙者酢也王與尸賓相答酢也云賓客食而王有胙俎是禮食者以其賓客與祭祀同科故知非凡平燕食按公食大夫主君與聘大夫禮食賓前有食君前無食今天子與諸侯禮食王前有食俎者天子於諸侯其禮異於諸侯與聘大夫也云主人飲食之俎皆為胙俎者按特牲

少牢主人胙俎直是祭祀不兼賓客此則俱有也
凡王之稍事設薦脯醢

注鄭司農云稍事謂非日中大舉時而閒食玄謂稍
事有小事而飲酒

疏先鄭意旦及日中食牲牢日中後空食脯醢後
鄭不從者玉藻諸侯猶夕祭牢肉則天子夕食牢
肉可知又脯醢是飲酒肴羞非食饌若大夫以下
燕食有脯無膾設脯不嫌若王之日食不得空薦

脯醢也

王燕飲酒則為獻主

注鄭司農云主人當獻賓則膳夫代王為主君不敵臣也

掌后及世子之膳羞

注亦主其饌之數不饋之耳

疏上王日一舉注后與王同庖不言世子則世子別牲云不饋之者按上文膳夫饋王故云品嘗食

按內饗共后及世子之膳羞則是后世子內饗饋之

凡肉修之頒賜皆掌之凡祭祀之致福者受而膳之以
拊見者亦如之

注致福謂諸臣祭祀歸胙于王鄭司農云膳夫受之
以給王膳

疏云致福者凡祭主人受福若與王受福然知諸
臣有致胙法者左傳子產云祭有受脰歸脰注云

受脤謂公頒祭肉於大夫歸脤謂大夫歸胙于公
歲終則會唯王及后世子之膳不會

注不會計多少優尊者其頒賜羣臣則計之

疏此膳夫所掌膳羞是其正故世子亦不會庖人
掌禽獻是其加故王及后不會世子則會之訓膳
夫所掌飲食皆所以共王后世子者其米穀之物
則取之菴人其禽獸之物則取之庖人其割烹之
事則責之內饗其調和之宜則掌之食醫其酒醬

醢醢之屬則取之酒人漿人醢人膳夫蓋掌
其陳數與凡禮儀是故每食則有授祭嘗食之節
齋戒朔食則有加牢之文其或怪異災祲則有徹
牲廢樂之事此一日一舉之常食也至于祭祀賓
客之禮食非時小事之飲酒或與羣臣禮燕而示
慈惠凡皆有王食之禮事焉膳夫皆親其薦徹代
其獻酢若乃后世子之膳羞與夫諸臣之頒賜雖
非王食之所關而或同君之庖或以餼君之惠則

其儀亦不可以不備至於家祭之歸豚羣工之禽
摯雖非食官之所共而或以明其受福或以享其
臣人則亦可以佐珍羞之所不及此膳夫所以調
變玉躬而為食官之長也燕食之列於祭祀賓客
之上何也曰此日食之常也故因王日一舉之文
而遂次之所以終日食之事耳

庖人掌共六畜六獸六禽辨其名物凡其死生蠹莩之
物以共王之膳與其薦羞之物及后世子之膳羞共祭

祀之好羞共喪紀之庶羞賓客之禽獻

鰾惡然反薨古
老反好呼報反

注六畜六牲也始養之曰畜將用之曰牲春秋傳曰

卜曰曰牲鄭司農云六獸麋鹿熊麇野豕兔六禽雁

鶉鷄雉鳩鴿玄謂獸人冬獻狼又內則無熊則六獸

當有狼而熊不屬六禽於禽獻及六摯宜為羔豚犢

麇雉雁凡鳥獸未孕曰禽薦亦進也備品物曰薦致

滋味乃為羞王言薦者味以不褻為尊鄭司農云鮮

謂生肉薨謂乾肉好羞若荊州之鰾魚青州之蜊胥

雖非常物進之孝也喪紀之祭謂虞祔也禽獻獻禽
于賓客

疏云掌共六畜者馬牛羊犬豕雞謂夏官校人地
官牛人春官雞人秋官犬人冬官豕人總送六畜
與此庖人六獸六禽即下獸人送之庖人得之共
與膳夫內外饗也云鳥獸未孕曰禽者欲見禽中
不妨有羔豚犢麋據以禽作六摯禽中亦有羔是
其未孕者也云備品物曰薦致滋味乃為羞者對

后世子羞言膳即是致滋味之羞備品物者謂王
舉則共醢六十甕共醢物六十甕及三牲之俎皆
是致滋味乃為羞謂百有二十品者云祭祀之好
羞則是非常之物尋常所共者在內外饗也云共
喪紀庶羞者凡喪未葬以前無問朝夕奠及大奠
皆為薦羞之法為虞祔之祭乃有庶羞虞後有卒
哭祭明日乃祔今不言卒哭者卒哭亦共庶羞可
知賓客之禽獻謂掌客所共乘禽是也訓名物謂

畜獸禽各異也死生蠡斃謂畜獸禽或生或死或
蠡或斃也言共喪紀之庶羞則薦羞亦共之矣

凡令禽獻以灋授之其出入亦如之

注令令獸人也禽獸不可久處賓客至將獻之庖人
乃令獸人取之必書所當獻之數與之及其來致禽
亦以此書校數之至于獻賓客又以此書付使者展
而行之掌客乘禽于諸侯各如其命之數聘禮乘禽
於客日如其饗餼之數士中日則二雙

疏云其出入亦如之者庖人以當獻之數令獸人
是其法獸人依數以禽入庖人是入也庖人還依
數付使者送賓館是出也鄭引掌客及聘禮者掌
客乘禽各依命數是諸侯禮聘禮乘禽于諸侯之
卿大夫不依命數如公侯伯之卿三命子男之卿
再命爵皆卿也命數雖不同皆饗餼五牢乘禽曰
五雙故言日如其饗餼之數云士中日則二雙者
謂士一日則一雙禽獻中間也問日則二雙也此

所謂以法授之也訓注疏以此節專承賓客愚意
上文王后世子之膳羞以至祭祀喪紀賓客皆用
禽獸並有灋以出入之則此似不得單言賓客也
禽獻獻字當從故書作獸字

凡用禽獻春行羔豚膳膏香夏行腍鱠膳膏臊秋行犢

麋膳膏腥冬行鱣羽膳膏醢

膏香禮記作腍音同脰其
居反鱣所留反臊素刀反

然反

注用禽獻謂煎和之以獻王鄭司農云膏香牛脂也

脂乾雉鰯乾魚杜子春云膏臊夫膏膏腥豕膏魚
也羽雁也膏羶羊脂玄謂膏腥雞膏也羔豚物生而
肥積麋物成而充脂鰯腥熱而乾魚雁水涸而性定
此八物者得四時之氣尤盛為人食之弗勝是以用
休廢之脂膏煎和膳之牛屬司徒主也雞屬宗伯木
也犬屬司寇金也羊屬司馬火也

疏五行不言北方豕之脂膏者四時食法皆用死
之脂膏殺其氣豕北方水土賊水但無中央食法

故不言五行王相相刻春木王火相土死金囚水
為休廢夏火王土相金死水囚木為休廢以下皆
然王所勝者死相所勝者囚新謝者為休廢若然
所膳脂膏並是死者云休廢者散文通也訓此亦
通言用禽獸法

歲終則會唯王及后之膳禽不會

訓庖人所掌無烹調之事但共其物以與膳夫內
外饗即用禽獸亦謂共其物也魚鼈中魚有魚

內饗掌王及后世子膳羞之割亨煎和之事辨體名肉

物辨百品味之物

亨普
庚反

注割肆解肉也亨煮也煎和齊以五味體名脊脅肩
臂臠之屬肉物載燔之屬百品味庶羞之屬

疏云體名脊脅肩臂臠之屬者按少牢解羊豕前
體肩臂臠後體膊髀又有正脊脰脊橫脊短脅正
脅代脅為十一體云肉物載燔之屬者按公食大
夫十六豆有載又少牢主婦獻尸以燔從切肉曰

載傳火曰燔訓體名肉物謂牛羊豕百品味謂醢
醢羞珍皆是體名體各異名肉物即謂每體之肉
物總之也體名肉物即下文所以實鼎俎者百品
味即下文百羞醬物珍物也

王舉則陳其鼎俎以牲體實之選百羞醬物珍物以俟
饋

注取於醵以實鼎取於鼎以實俎實鼎曰胥實俎曰
載選謂恒選擇其中御者

疏百羞者庶羞百二十醬物者醬百二十饔珍物

者諸八珍之類

胥職
升反

共后及世子之膳羞

注膳夫掌之是乃共之

辨腥臊羶香之不可食者牛夜鳴則庖羊冷毛而羶羶

犬赤股而躁臊鳥鰾色而沙鳴豕盲眊而交睫腥馬

黑脊而般臂螻

庖音由病也冷音零羶音脆此內切躁則到切鰾本又作鰾芳表反豕音鬱盲

已亮反眊音視眊音

接般音班螻音樓

注腥臊羶香可食者是別其不可食者則所謂者皆
臭味也冷毛毛長總結也醵失色不澤美也沙澌也
交睫腥腥當為星肉有如米者似星般臂臂毛有文
鄭司農云盾朽木臭也螻蛄臭也杜子春云盲眊
當為望眊

疏鄭云腥臊羶香可食者即上庖人所云以腥臊
羶香表牛羊豕雞也赤股股裏無毛

凡宗廟之祭祀掌割亨之事凡燕飲食亦如之凡掌共

羞修刑膾胖骨鱠以待共膳凡王之好賜肉修則饗人

共之

膾音無武夫切又火吳反胖普半反

注掌共共當為具羞庶羞也修鍛脯也胖如脯而腥者刑鉶羹也膾腠肉大臠所以祭者骨牲體也鱠乾魚好賜王所善而賜也

疏內饗不掌外神故云宗廟之祭祀燕飲食謂王及后世子云修鍛脯者謂加薑桂鍛治之若不加薑桂不鍛治者謂之脯云胖如脯而腥者乾則為

脯不乾為胖云膾腍肉大臠所以祭者膾詁為大魚肉皆有之有司徹云主人一魚加膾祭于其上故云所以祭也訓凡燕飲食疑是內賓客如圖宗人於燕朝以飲食之禮親宗族兄弟是也

外饗掌外祭祀之割亨共其脯修刑膾陳其鼎俎實之牲體魚腊凡賓客之飧饗饗食之事亦如之

食音
刷

注飧客始至之禮饗既將幣之禮致禮於客莫盛於饗

疏外祭祀謂天地四望山川社稷五祀鄭云致禮
於客莫盛於饗者饗有飪有腥有牽又有酒有米
魚燕與食其中芻新米禾又多也訓亦如之者謂
掌割烹共脯修刑膾實牲體魚腊之事也其生牢
當是庖人共與掌客共米與酒則廋人酒人共之
也

邦饗者老孤子則掌其割烹之事饗士庶子亦如之

注孤子者死王事者之子也士庶子衛王宮者若今

之饗衛士矣王制曰周人養國老於東膠養庶老於虞庠

疏云饗耆老者謂死事者之父祖兼有國老庶老師役則掌共其獻賜脯肉之事

注獻謂酌其長帥

疏獻謂獻酒非獻肉故鄭謂酌其長帥長帥軍將以下至伍長有功者饗獻之

凡小喪紀陳其鼎俎而實之

注謂喪事之奠祭

疏小喪紀謂夫人以下之喪

亨人掌共鼎鑊以給水火之齊職內外饗之饗亨煮辨

膳羞之物

齊才細反
饗七亂反

注鑊所以煮肉及魚腊之器既孰乃胾于鼎齊多少
之量職主也饗今之竈主於其竈煮物

疏案少牢大夫五鼎羊豕腸胃魚腊各異鑊鑊別
一鼎鑊中肉孰各升一鼎水火之齊謂實水於鑊

及爨之以火皆有多少之齊膳羞謂牢鼎之物是也

祭祀共大羹鉶羹賓客亦如之

注大羹肉湑鄭司農云大羹不致五味也鉶羹加鹽菜矣

疏大羹鑊中煮肉汁一名湑盛於登不調以鹽菜五味鉶羹皆是陪鼎腳腫曉牛用藿羊用苦豕用薇調以五味盛於鉶謂之鉶羹若盛于豆即謂之

庶羞賓客饗食亦應有大羹故云亦如之訓案陪鼎有二用在鉶為鉶羹在豆為庶羞見於此矣

甸師掌帥其屬而耕耨王藉以時入之以共盛

耨乃豆反

藉同籍
盛音資

注其屬府史胥徒也耨芸芋也王以孟春躬耕帝藉天子三推三公五推卿諸侯九推庶人終於千畝庶人謂徒三百人

疏天子藉田千畝在南郊藉田之穀衆神皆用獨

言帝藉者舉尊言之云耨芸者芸勛子擁本也
以時入之謂麥則夏熟禾黍秋熟以時送入地官
神倉粢盛者六穀曰粢在器曰盛爾雅以稷為粢
稷五穀長通而言之六穀皆是粢也

祭祀共蕭茅共野果蓏之薦

蓏力
果反

注杜子春云蕭香蒿也玄謂即詩云取蕭祭脂茅以
共祭之苴亦以縮酒苴以藉祭縮酒沛酒也醴齊縮
酌甸在遠郊之外郊外曰野果桃李之屬蓏瓜瓠之

屬

疏蕭茅蕭惟祭祀宗廟時有之茅則外內之神俱
用案司巫云祭祀共植館謂甸師共茅與司巫司
巫為苴以共之此據祭宗廟也鄉師云大祭祀共
茅植據祭天時亦甸師送茅與鄉師為苴則甸師
惟共茅不共苴也有核為果無核為祿

喪事代王受眚哉

眚生
景反

注染盛者祭祀之主也今國遭大喪若云此黍稷不

馨使鬼神不逞于王既殯太祝作禱辭授甸人使以
禱藉田之神受青莪弭後殃

疏知太祝作禱辭在既殯後者太祝職授甸人禱
辭在大斂後大斂則殯也

王之同姓有皐則死刑焉

皐古
罪字

注鄭司農云文王世子曰公族有死罪則磬於甸人
又曰公族無官刑不踐其類也刑于隱者不與國人
慮兄弟

疏言同姓者絕服之外同姓姬者死刑焉謂死及肉刑司寇斷獄定罪訖適甸師氏而刑殺之不於市朝也案掌囚云凡有爵者與王之同族奉而適甸師氏以待刑殺此不言有爵者又不具帥其徒以薪蒸役外內饗之事

注役為給役也木大曰薪小曰蒸

疏其徒三百人耕藉田千畝其事至閒故庶為外內饗所役

獸人掌罟田獸辨其名物

注罟網也以網搏所當田之獸

疏四時田獵春用火夏用車秋用羅冬用徒四時各有其一以為主無妨四時兼有罔取當田之獸冬獻狼夏獻麋春秋獻獸物

注狼膏聚麋膏散聚則溫散則涼以救時之苦也獸物凡獸皆可獻也

疏案內則取稻米為狼臙膏以為飭則狼之所用

惟取膏若廩之所用則多矣春秋凡獸物皆可獻者以其寒溫適也

時田則守罟及幣田令禽注于虞中

注守罟備獸觸攫弊仆也仆而田止鄭司農云虞中謂虞人釐所田之野及弊田植虞旗於其中致禽而珥焉獸人主令田衆得禽者置虞人所立虞旗之中當以給四時社廟之祭故曰大獸公之小禽私之公之謂輸之於虞中珥焉者取左耳以致功若斬首折

識

疏注猶聚也云致禽而珥焉謂大獸公之者已孕
曰獸未孕曰禽

凡祭祀喪紀賓客共其死獸生獸

注共其完者

訓生獸則獸人直供與庖人死獸則付之腊人或
鮮之或乾之以共庖人之用也但言祭祀賓客喪
紀等不言王膳者省文實王膳亦在其中也

凡獸入于腊人皮毛筋角入于王府

筋音斤

注當乾之

訓入于腊人則是死獸也故取其皮毛筋角焉生獸雖非直共腊人及其用之亦必入腊人之手則其皮毛筋角亦皆均取之焉

凡田獸者掌其政令

訓凡田獸者謂卿大夫常田及百姓田獵是也政令者為之厲禁有時以取之有禮以限之亦或徵

其皮角筋骨馬凡田獸者先受政令于獸人及田則迹人依政令而糾察之也

廩人掌以時廩為梁

注月令季冬命漁師為梁鄭司農云梁水偃也偃水為關空以筍承其空

疏言以時廩為梁者謂一歲三時取魚皆為梁以取之偃水為關空者偃水兩畔中央通水為關孔以筍承其空者筍者輦薄以薄承其關孔取魚也

金匱要略卷二
春獻王鮪

注王鮪鮪之大者月令季春薦鮪于寢廟

疏取魚之法歲有五月令孟春云獺祭魚此時得
取一也秋季薦鮪二也鼈人云秋獻龜魚三也王
制云獺祭魚然後虞人入澤梁是十月四也季冬
漁人始魚五也三時取魚唯夏不取案魯語云宣
公夏濫於泗淵以其非時里革諫之

辨魚物為鱣鼈以共王膳羞

鼈本又作
鰐苦老反

訓蓋共之庖人

凡祭祀賓客喪紀共其魚之鱣鼈凡獻者掌其政令凡獻征入于王府

疏此所共者共內外饗漁征謂近川澤之民於十月獺祭魚之時其民亦得取魚水族之類其中鬚骨堪飾器物故征之也

鼈人掌取互物

注鄭司農云互物謂有甲鼃胡龜鼈之屬

詩莫于反

以時簪魚鼈龜蜃凡獍物

簪音況士角切蜃音
腎時忍切獍莫皆反

注蜃大蛤鄭司農云簪謂以杓刺泥中搏取之

春獻鼈蜃秋獻龜魚

注此其出在淺處可得之時魚亦謂自獍藏

疏簪魚鼈據所取春鼈蜃秋龜魚據所獻其時一

也鄭云魚亦謂自獍藏者若不自獍藏則在上漁

人取之矣

祭祀共廬巖蜺以授醢人

廬薄佳反巖音裸郎
果反蜺音非直尼切

注羸蟪蛄鄭司農云羸蛤也杜子春云蟬也蛄蟬子
疏案醢人有羸醢羸蛄醢故以此三者授之蛤即
蟬一物也蟬子者謂蟻之子

掌凡邦之籍事

腊人掌乾肉凡田獸之脯腊臠胖之事

注大物解肆乾之謂之乾肉薄析曰脯捶之而施薑
桂曰鍛修腊小物全乾

疏云小物全乾者案特牲云陳鼎于門外楨在其

南南順實獸于上又云宗人舉獸尾告備蓋士用
兔是小物全乾者少牢用麋不云舉獸尾則未全
然則天子所用之獸必大亦必不全今云全者謂
有全者耳趙商問腊人掌乾肉而有膾胖何鄭答
雖鮮亦屬腊人訓言田獸別於牲也脯腊膾胖四
名惟腊專是獸脯與膾胖牲亦有之

凡祭祀共豆脯薦脯膾胖凡腊物

豆音羞胖普
半反杜音版

注脯非豆實豆當為羞聲之誤也膾詁曰大謂腍肉

大臠胖宜為脯而腥胖之言片也析肉意也禮有腥
臠皆先制乃烹

疏知脯非豆實者案遵人職有栗脯則脯是遵實
知豆當為羞者案遵人職云凡祭祀共其遵薦羞
之實鄭云未飲未食曰薦已飲已食曰羞羞薦相
對下既言薦脯明上當言羞脯也云胖宜為脯而
腥謂肉薄不煮者云胖之言片析肉意者解胖是
薄義云禮有腥臠皆先制乃烹者祭祀有薦腥

薦爛薦熟三者皆當先制為胖也

賓客喪紀共其脯腊凡乾肉之事

疏此所共者共內外饗也訓不言膳羞者省文

醫師掌醫之政令聚毒藥以共醫事

注藥之物恒多毒

疏共醫事謂共疾醫瘍醫等

凡邦之有疾病者疖瘍者造焉則使醫分而治之

疖音匹

婢切瘍音羊

造七報反

注疔頭瘍亦謂禿也身傷曰瘍分之者醫各有能

疏下有食醫獸醫亦屬醫師不來造醫師者食醫
主齊和飲食不須造醫師獸醫掌畜獸之賤其畜
獸便造獸醫故亦不須造醫師言疔頭瘍者案下
瘍醫不言疔腫瘍等可以兼之醫各有能者疾醫
不知瘍瘍醫不知疾故分而治之也

歲終則稽其醫事以制其食十全為上十失一次之十
失二次之十失三次之十失四為下

注食祿也以失四為下者五則半矣或不治自愈

疏祿食有常令差為五等者但功適中者守本祿
功高者益之功下者損之訓程伊川曰十全為上
非謂十人皆愈但知可治不可治者十人皆中即
為上耳

食醫掌和王之六食六飲六膳百羞百醬八珍之齊

食

嗣齊才

細反

注和調也

疏此等並是膳夫所掌食醫調和而已訓內饗所掌煎和專是牢鼎之物食醫則兼食飲諸物齊和之六膳即六牲

凡食齊眡春時羹齊眡夏時醬齊眡秋時飲齊眡冬時

眡
眡音

注飯宜溫羹宜熱醬宜涼飲宜寒

疏羹謂大羹鉶羹菜羹等醬者食之主言醬則該諸豆實矣訓此以春夏秋冬表見溫熱涼寒也

凡和春多酸夏多苦秋多辛冬多鹹調以滑甘

和胡
卧反

注各尚其時味而甘以咸之猶水火金木之載於土
內則曰棗栗飴蜜以甘之薑蔥粉榆兔槁膠飴以滑
之

疏春多酸者春時調和食物酸多於餘味一分也
四時皆然訓上文是四時無異者此條是四時各
異者

凡會膳食之宜牛宜稌羊宜黍豕宜稷犬宜粱雁宜麥

魚宜菰

稌音杜
菰音孤

注會成也謂其味相成鄭司農云稌稷也爾雅曰稌
稻菰彫胡也

疏此膳食相宜之法依本草素問牛味甘平稻味
苦而溫甘苦相成羊味甘熟黍味苦溫亦甘苦相
成粳豕味酸牝豕味苦稷米味甘犬味酸而溫粱
味甘而微寒雁味甘平大麥味酸而溫小麥味甘
微寒俱是氣味相成魚族甚多寒熱酸苦兼有而

云宜菰或同是水物相宜故云魚宜菰

凡君子之食恒放焉

䟽上六食六飲一經據共王凡食齊已下雖以王
為主君子大夫以上通依之也

疾醫掌養萬民之疾病四時皆有癘疾春時有瘳首疾
夏時有痒疥疾秋時有瘧寒疾冬時有嗽上氣疾

瘳音痒
消痒

以掌反疥音
介嗽西豆反

注癘疾氣不和之疾瘳酸削也首疾頭痛也嗽教也

上氣逆喘也

疏云痛酸削者人患頭痛則有酸嘶而痛酸削則酸嘶也此直言萬民不言王與大夫醫師雖不言或可醫師治之

以五味五穀五藥養其病

注養猶治也病由氣勝負而生攻其贏養其不足者五味醪酒飴蜜薑鹽之屬五穀麻黍稷麥豆也五藥草木蟲石穀也

金匱要略卷之八
疏氣勝負如體寒即是水水贏而勝火氣負而不
足也五味醯酸酒苦飴蜜甘薑辛鹽鹹也五藥有
穀者謂五穀之中麻豆之等有入藥分者是也訓
凡人之病其於五味五穀亦各有宜有不宜者焉
所宜者即可以養其病也

以五氣五聲五色眡其死生

注三者劇易之徵見於外者五氣五藏所出氣也肺
氣熱心氣次之肝氣涼脾氣溫腎氣寒五聲音語宮

商角徵羽也五色面貌青赤黃白黑也察其盈虛休
王吉凶可知

疏劇易者人病在內見其聲色則知增劇及簡易
云察其盈虛休王吉凶可知者假令冬時面色黑
其氣寒聲應羽此是盈而王吉可知其色黃其氣
熱聲應宮此得中央土來尅已此是虛而休凶可
知若得東方青色等則子來助已亦吉訓氣謂冷
熱之見於皮膚者也此溫熱寒涼之氣非五臟之

常皆於病時察之驗其何氣則知其受病之處也
五聲如肝聲呼心聲歎脾聲歌肺聲哭腎聲呻皆
謂受病時聲以此氣聲色之發於外者占其病候
又其甚者以知死生也

兩之以九竅之變參之以九藏之動

竅苦
事反

注兩參之者以觀其死生之驗竅之變謂開閉非常
陽竅七陰竅二藏之動謂脈至與不至正藏五又有
胃膀胱大腸小腸

疏陽竅七者在頭露見為陽陰竅二者在下不見
為陰正藏五者肺心肝脾腎又有胃膀胱大小腸
此乃六府中取出四者六府胃小腸大腸膀胱膽
三焦以其受盛故謂之府亦有藏稱故入九藏案
黃帝八十一難經胃為水穀之府小腸為受盛之
府大腸為行道之府膀胱為津液之府此正府也
故入九藏膽者清淨之府三焦為孤府非正府故
不入九藏訓兩參俱承上文言皆所以貶其死生

五氣五聲五色一也九竅之變兩也九藏之動三也癘疾四者乃四時民病之凡五味五穀五藥乃隨時救病之具氣聲色其發見之最粗者九竅則較微矣九藏則尤微矣觀其外以知其內審其內以合其外皆所以為臆病之方用藥之本者也

凡民之有疾病者分而治之死終則各書其所以而入于醫師

注少者曰死者曰終所以謂治之不愈之狀也醫

師得以制其祿且為後治之戒

瘍醫掌腫瘍潰瘍金瘍折瘍之祝藥劑殺之齊

折時設
反劑音

刮齊才

細反

注腫瘍癰而上生創者潰瘍癰而含膿血者金瘍刀
瘡也折瘍蹠跌者祝當為注注謂附著藥劑刮去膿
血殺謂以藥食其惡肉

疏齊者注藥於瘡乃後刮殺亦有齊量之宜癰而
上生瘡者謂癰而有頭未潰者

凡療瘍以五毒攻之

注止病曰療五毒五藥之有毒者今醫方有五毒之藥作之合黃堞置石膽丹砂雄黃礬石慈石其中燒之三日三夜其煙上著以雞羽掃取之以注創惡肉破骨則盡出

疏黃堞如今時和合丹藥用黃瓦甗為之亦名黃堞

以五氣養之以五藥療之以五味節之

注既刮殺而攻盡其宿肉乃養之也五氣當為五穀
節節成其藥之力

疏五穀五味皆當據病所宜云節成其藥之力者
即下文以酸養骨之類是也訓五毒以攻其外五
藥以療其內五穀以補五毒之傷五味以成五藥
之效

凡藥以酸養骨以辛養筋以鹹養脈以苦養氣以甘養
肉以滑養竅

注以類相養也酸木味木根立地中似骨辛金味金之纏合異物似根鹹水味水之流行地中似脈苦火味火出入無形似氣甘土味土含載四者似肉滑滑石也凡諸滑物通利往來似竅

訓此謂藥之五味所養如此物之五味其所養亦如此故可以助成藥之功也

凡有瘍者受其藥焉

獸醫掌療獸病療獸瘍

注畜獸之疾病及瘍療同醫

疏此醫惟療家畜不療野獸但畜獸通耳

凡療獸病灌而行之以節之以動其氣觀其所發而養之

注療畜獸必灌行之者為其病狀難知灌以緩之且強其氣也節趨聚之節也氣謂脈氣既行之乃以脈眡之以知所病

訓灌謂灌之以藥也觀其所發大略亦不外於五

氣五聲五色九竅之類

凡療獸瘍灌而劑之以發其惡然後藥之養之食之

音食

嗣

王亦先攻之而後養之

凡獸之有病者有瘍者使療之死則計其數以進退之
疏上醫師云十全為上惟據疾醫瘍醫不據獸醫
故此云計其數以進退之所謂進退其祿也

周禮纂訓卷二